



16. agusti 2019

UKA2019/60

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqqummiuppara:

**Cigarittikut taamatullu cigarittit kimmivikui utertittartussanngorlugit
qularnaveeqquserneqartalernissaasa iluaqtissartai ajoqtissartaalu misissuviveqqullugit
Naalakkersuisut peqquneqarnissaannik Inatsisartut aalajangiiffigisassaattut siunnersuut.
Misissuinerup inernerar Inatsisartunut saqqummiuteqquneqarpoq kingusinnerpaamik UKA 2020-mi
ataatsimiinneq aallartippat.**

(Inatsisartunut ilaasortaq Justus Hansen, Demokraatit)

Tunngavilersuut

Nunatsinni sumiikkaluaruttaluunniit maluginngitsuugassaanngilaq nunami cigarittit kimmivikuinik sumuisarneq. Aqqusinerniippput aamma pinngortitamiippput.

Kusanangillat - aamma avatangiisit sunnernerlerunneqartarput immaqa amerlanerit ilisimanngisaannik.

Cigarittit kimmivii imaqarput celluloseacetatimik, plastikkimut assigusoq, arriitsuaqqamik asiuartuaatartoq. Mingutsitsisuuvoq mikroplast atorneqartoq imartatsinnut tuttarmat aalisakkanillu taamatullu timmissanit nerineqartarluni.

Cigarittit kimmivikui atornikut - aamma akuutissanik ulorianartunik pinngortitamut tuttitsisarput; arsenimik, nikotinimik, akuutissanik arrottinnejarsinnaanngitsunik soorlu aqerlumik, kanngussamik, kromimik aamma cadmiumimik kiisalu usserummik. Laboratorimi imeq tarajumik akusaq imerlu tarajumik akusaanngitsoq atorlugit misissuinermi ilisimatuut paasinikuuat cigarittip kimmivikua imermut literimtu ikingaanni imarmi tarajulimmi tarajoqanngitsumilu aalisakkat uumasut toqunneqartartut¹.

Taamaattumik cigarittit kimmivikui eqqaavimmiumiittussaapput nunamut eqqarnagit.

Pujortartartut kimmivikutik sinnikutilluunniit isumagisartussaagaluarpaat malunnarporsi taamaattoqarneq ajortoq.

Tamanna tunngavigalugu isumaqarpunga piffissanngortoq allaanerusumik periuseqalernissarput. Isumaqarpunga qularnaveeqqusiisarneq atulertariaqaripput soorlu taamatut periuseqartugut puujaasaaqqat pineqartillugit.

¹ <https://www.cancer.dk/forebyg/undga-roeg-og-rygning/passiv-rygning/udendoers-rygning/cigaretskod/>



Kisianni tuaviupilulluta qularnaveeqqusisarneq eqqutissangnilarput. Pitsaanerpaasussaavoq misissuillaqqaarnissarput. Tassunga atatillugu eqqarsaatigilluagassagut arlaqarput.

Siullermik pingaaruteqarpoq paassisallugu qularnaveeqquseeriaaseq qanoq eqqortoq atorneqassanersoq. Kmmivikut ataasiakkaarlugit imaluunniit katarsorneqarsimasut oqimaassusaat gramminngorlugu tunngaviussava?

Tamatuma saniatigut aamma pingaaruteqarpoq paassisallugu kimmivikut sumut tunniunneqartassanersuq aamma minnerunngitsumik qanoq katarsorneqartassanersut ikuallanneqarlutillu. Uanga isumaga naapertorlugu tamanna pisassaaq avatangiisinut peqqissutsimullu ulorianartorsiortitsinngitsumik.

Aamma pingaaruteqarpoq paassisallugu qularveeqqut qanoq akilerneqartassanersoq cigarittinik pisinermi. Qularnaveeqqutip utertitassat akeqqatigissavai imaluunniit cigarittit ataasiakkaarlugit akisuninngorlugin nioqqutigineqartassappat? Tassunga pissutaavoq aamma cigaritteqarmat kimmiveqanngitsunik aamma innuttaasut peqqinnissaat eqqarsaatigalugu naapertuunnavianngilaq cigarittit kimmiveqanngitsut kimmiveqanngitsunut naleqqiullugit allaanerusumik akeqartinneqarnissaat.

Tamatuma saniatigut misissorlugu paasiniartariaqarpoq innuttaasunut peqqissutsikkut kingunissai ilangullugit meeqqat cigarittit kimmivikuunik katarsalersussat. Peqqissutsikkut qanoq kinguneqassava meeqqat toqunartumik aqqusinerni katarsalisappata?

Aamma naggataatigut pingaaruteqanngitsoortussaanngilaq misissussallugu utertitsalernissap qanoq akeqarnissaa aamma ingerlannera qanoq akeqassanersoq. Uanga nammineq isumaqarpunga pilersitsineq ingerlatsinerlu atuisartut akilertariaqartassagaat, tassa uunga tunngatillugu pujortartartut. Tamanna assersuutigalugu pisinnaavoq cigarittit akitsuutaannik qaffaanikkut taamaasillatalu qularnaarlugu pujortartartut akitsuummik akiliisarnissaat. Aammali tamanna itinerusumik misissortariaqarpoq.

Neriuppunga Naalakkersuisut partiillu sinnerisa siunnersuutiga iluatigiumaaraat aamma ilalerneqarumaartoq.

Pisortanut aningasaqarnikkut allaffissornikkullu kingunerisassai

Misissuinerup ingerlanissaata suliarineqarnera aningaasartuutitaqassaaq. Taakkuli ukiup affaani ilinniagartuup sulilluni aningaasarsiaanit amerlanerunissaat naatsorsuutigineqanngilaq.

Innuussutissarsiornermut aningasaqarnikkut allaffissornikkullu kingunerisassai

Misissuinermut atatillugu soqanngilaq.

Innuttaasunut aningasaqarnikkut allaffissornikkullu kingunerisassai



DEMOKRAATIT
DEMOKRATERNE

Misissuinermut atatillugu soqanngilaq.